

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Robert Arends

Minister demisionario mester bay cas



E sistema Hulandes cu ta permiti un Minister demisionario (= cu a perde confiansa di mayoria den

Parlamento) keda funciona ta di tempo colonial (= tempo di metemento inapropia) y no ta cuadra

mas den tempo moderno.

Awor na 2024/2025 ainda nos ta mira con ministernan de-

misionario ta sigui goberna y influencia maneho di un Gobierno nobo mientras nan a wordo manda cas pa pueblo (= perde mayoria den Parlamento). A bira tempo pa nos politiconan mes cuminsa cambia situacionnan anticua cu no ta cuadra mas den tempo moderno, maske e por perhudica nan mes.

Posibel solucion facil ta:

- Eligi Ministernan pareu cu ta eligi parlamentari-
onan;
- Aplica exigencian-
an/control riba candidato-

minister durante e periodo di eleccion (y no despues di eleccion) di moda cu nan por sinta como minister mesora despues di eleccion mescos cu e parlamentarianan. Meta di cambio mester ta cu ministernan cu perde confiansa di mayoria di parlamento mester baha mesora como minister y bay cas direct despues di eleccion.

No por sigui mantene sistem-
anan anticua cu no ta cuadra
mas den tempo moderno!

Skirbi pa Gerald (Gerry) Franca

Nos gobernantenan ta stima Aruba of nan ta stima nan mes

Actualmente nan ta construyendo un hotel di 900 camber aki na Aruba den Colony, e prome pregunta cu a bin dilanti ta: E proyecto aki no tin niun beneficio pa Aruba?

Aruba NO tin desempleo, tur dia Dimas ta firma pa un boshi trahador stranhero pa por traha legal na Aruba.

Den caso normal e ta bay crea direct y indirect 6 X 900 = 5400 cupo di trabou kendenan ta bay trece nan famia X3 sea ta bay atrae un total di 16.200 hende.

Di e 5400 cupo di trabou cu ta wordo crea 80% of 4320 ta bay gana un salario minimo nan NO ta bay paga loon-belasting. Cu e decision aki nos grupo di salario minimo ta bay pasa di 70% di nos total trahador na Aruba.

Den Economia e proyecto aki ta contribui na un crecimiento economico y NO na e DESAROYO di nos Economia. Cu otro palabra e ta bay contribui na un desaster social.

Cualquier hotel di mas cu 50 camber cu habri su portanan na e momento aki, no importa na ki parti di Aruba, e ta bay haci mas daño cu bon na "Aruba".

Ken por ta e autor di e mon-
ster aki? Ta imposibel cu na altura aki di bida un politico por hinca den su cabes pa bin cu un proyecto desastroso asina. E costo social di



e proyecto aki ta bay ta un Desaster pa Aruba. Mester compronde cu cada proyecto turistico cu bin awor aki ta aumenta nos problemanan Social.

Na kico e hotel aki ta bay beneficia Aruba y e Arubianonan?

A bira tempo pa nos Parlamento traha riba un ley cu ta exige cu cada proyecto Comercial (Hotel) nobo mester presenta un estudio di "Evaluacion Social" di nan proyecto cu tin cu wordo publica 3 biaha den diferente corant y media, esaki tin cu reemplaza e asina yama "estudio di Factibilidad" cu por cierto semper ta positivo ya cu e ta exclui e aspecto di e costo di infraestructura y costo social. E evaluacion social mester muestra e beneficio social contra e costo social di cada proyecto.

Ta bon conoci cu ta hopi dificil pa por biba un bida decente y mantene un famia cu un salario minimo Un porcentahe masha halto di nos hobenan ta bay school sin desayuno pasobra no tin nada na cas pa come. Realidad tambe ta cu pa cada hotel nobo mester

importa tur e trahadornan for di exterior. Na e momento aki tur proyecto di mas camber cu bini tin un costo social halto y no ta na conveniencia di e pueblo pa trah'e. Sea cu cada biaha cu un camber di hotel keda cla e porcentahe aki ta subi y e nivel di calidad bida na Aruba ta BAHA.

Un hotel nobo ta traduci su mes den entre otro den mas empleo di nivel di salario minimo, mas vivienda social, mas trafico riba caminda, mas stranhero, mas scol, mas cama na hospital, mas presion riba fondonan di AZV y SVb, mas problema social, mas criminalidad.

- 1- Hotel nobo, ta haya 10 aña liber di belasting,
- 2- no ta inverti ni un cen preto den traha caspa su trahadornan
- 3- no ta inverti den e integracion di nan trahadornan cu nan a importa for di exterior.
- 4- E trahadornan aki cu ta gana salario minimo, no ta aporta na belasting y un suma minimal na fondonan di AZV y SVb.
- 5- Nan ta adkiri derechonan substancial pa nan y nan famia ya cu e fondonan

aki ta traha a base di e principio di solidaridad.

6- Realidad ta cu no ta e Hotel pero Gobierno sea pueblo di Aruba tin cu carga cu e gastonan social di e "capital humano" di e hotel.

7- ya cu Gobierno (Pueblo) ta core cu e gastonan extra di seguro medico AZV, SVB, scol practicamente por nada, vivienda, expansion di e utilidadnan, servicionan di gobierno, ayudo social etc.

8- Tur e ganashi di e hotel ta keda afo. E Gerencia cu tin salario barbaro ta cobra nan salario pafo di Aruba pa no paga Belasting.

9- E empleadonan cu salario minimo tambe ta manda un poco di nan placa afor.

NO lubida cu un di e aspectonan hopi negativo di Turismo ta cu di 10 cupo di trabou cu e crea 8 ta salario minimo esaki tin como consecuencia mayor problema social, mas menornan na cas sin atencion di mayornan ya cu nan dos tin cu traha, mas hoben riba caya cu no ta bay school, mas problema cu droga, horta-
mento y atraco ta bin na moda, mas sufrimento den pueblo.

Ademas di construcion di hotel, nos ta mira e fenomeno di "Condominio" cu ta wordo traha riba tereno erfpacht cu ta wordo bendi pa miles di \$ "Prime Property". Con por ta posibel cu nos Gobernantenan a y ta entrega e terenonan aki pa nan rebende nan pa construi Condominio pa stranheronan. E terenonan

aki mester keda como reserva pa nos futuro generacionnan.

Esaki ta sosodiendo aki na Aruba sin ningun reserva pa añanan largo. Ehempel ta e tantisimo apartamentonan impagable pa un yiu di tera Arubiano banda di beach, cu no ta trece niun tipo di beneficio social pa nos comunidad. E culpabelnan ta cana rond sin escrupulo y ningun tipo di berguensa.

Lo ta bon pa Gobierno cambia su maneho y condiciona e permiso di trabao di tal manera cu e comerciante(hotelero) of individuo cu ta importa empleado pa traha, mester paga, un seguro medico apart pa cada trahador nobo cu nan kier trece awor pa un periodo minimo di 3 aña, mester percura pa un cas of un lugar decente pa nan y aporta na gastonan di educacion di nan yiu y aporta na e comunidad cu obranan social for di un parti di nan ganashi.

Recomendacion na nos Gobernnonan, pa di inmediato introduci un moratorium riba camber di hotel/hospedahe/Condominio, consolida nos posicion actual y mehora nos producto Turistico y Paraturistico nos por haya un miho prijs pa nos producto riba mercado cu e consecuencia pa un mihor salario y orario di trabou di 40 ora pa siman pa e trahador nan den hospitalidad y como consecuencia mihor beneficio social den nos comunidad.